



Eich cyf/Your ref: P-05-893
Ein cyf/Our ref JJ/06243/19

Janet Finch-Saunders AC
Cadeirydd y Pwyllgor Deisebau

SeneddDeisebau@Cynulliad.Cymru

13 Awst 2019

Annwyl Janet,

Diolch am eich llythyr dyddiedig 16 Gorffennaf ynghylch Deiseb P-05-893 - Achub Ein Parciau yng Nghymru

Mae Llywodraeth Cymru yn cydnabod y buddion niferus y gall mannau gwyrdd ac agored o ansawdd da eu cynnig. Mae mannau agored yn ganolbwynt ar gyfer chwaraeon a hamdden yn ein dinasoedd, ein trefi a'n pentrefi. Maent yn lleoedd cynhwysol eu natur, gan ddarparu mynediad i bobl o bob oed a chefnidir i amgylcheddau gwyrdd, iach. Rydym yn cydnabod yn ein Polisi Adnoddau Naturiol y cyfraniad sylweddol y mae mannau agored yn ei wneud i fioamrywiaeth ac ecoleg ledled y wlad ac rydym yn tynnu sylw at bwysigrwydd cael mannau gwyrdd hygyrch o ansawdd da yn ein cymunedau.

Cynllunio a mannau agored

Mae'r system gynllunio yn chwarae rhan bwysig a rhagweithiol wrth hyrwyddo gwerth mannau agored a sicrhau eu bod yn lleoedd hygyrch a deniadol. Mae polisi cynllunio cenedlaethol, a nodir ym Mholisi Cynllunio Cymru (Gol. 10, 2019), yn ymgorffori nodau Deddf Llesiant Cenedlaethau'r Dyfodol yn y system gynllunio. Mae hyn yn cynnwys ein hagwedd tuag at fannau agored, lle mae polisi cynllunio yn darparu cefnogaeth gref ar gyfer creu mannau agored newydd a chynnal y ddarpariaeth bresennol.

Mae Polisi Cynllunio Cymru, wedi'i ategu gan ganllawiau Nodyn Cyngor Technegol (TAN) 16: *chwaraeon, hamdden a mannau agored* (2009), yn ceisio sicrhau bod ddarpariaeth ddigonol o barciau a chaeau chwarae ledled Cymru. Mae awdurdodau cynllunio lleol yn cynnal Asesiadau Mannau Agored, sy'n edrych ar ansawdd a maint y mannau agored yn eu hardal, i lywio polisïau a chynigion yn eu Cynlluniau Datblygu Lleol (CDLI). Yn nodweddiadol, bydd CDLI yn nodi mannau agored presennol ac yn amlinellu gofynion ar gyfer darparu mannau agored newydd fel rhan o ddatblygiadau tai neu ddefnydd cymysg.

Mae gan y system gynllunio rôl allweddol hefyd wrth amddiffyn mannau agored presennol rhag datblygiad amhriodol ac rhag cael eu colli. Mae Polisi Cynllunio Cymru yn nodi "dylai awdurdodau cynllunio amddiffyn caeau chwarae a mannau agored sydd â gwerth amwynder neu hamdden sylweddol i gymunedau lleol rhag datblygu". Mae Chwaraeon

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1NA

Gohebiaeth.Julie.James@llyw.cymru
Correspondence.Julie.James@gov.Wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Cymru yn ymgynghorydd statudol ar geisiadau cynllunio sy'n effeithio ar gaeau chwarae, gan ddarparu cyngor gwerthfawr i awdurdodau cynllunio lleol.

Cefnogir amcanion y system cynllunio gan Cadw, sy'n diogelu gerddi, parciau a mannau gwyrdd eraill o ddiddordeb hanesyddol drwy'r broses gofrestru. Maent yn sicrhau bod pob safle ar y gofrestr o barciau a gerddi yng Nghymru yn cael eu hamddiffyn drwy'r system gynllunio. Nid yw'r gofrestr yn rhestr gaeedig a gellir ychwanegu safleoedd newydd sy'n bodloni'r meini prawf ar gyfer cofrestru gan roi amddiffyniad pellach rhag datblygu.

Cyllid

Mae'r mwyafrif helaeth o arian Llywodraeth Cymru ar gyfer parciau a mannau agored yn cael ei ddarparu trwy'r setliad llywodraeth leol heb ei ddynodi. Cyflwynir y setliad ar y sail mai awdurdodau lleol unigol sydd yn y sefyllfa orau i wneud penderfyniadau ynghylch blaenoriaethau gwariant yn eu hardaloedd. Mae'r system ariannu sydd gennym ar waith yn rhoi hyblygrwydd i awdurdodau lleol wneud y penderfyniadau hynny.

Cynnal mannau gwyrdd ac agored i safonau uchel

Rydym yn cydnabod pwysigrwydd mannau gwyrdd lleol hygyrch o ansawdd da ac felly rydym yn ariannu'r Wobr Baner Werdd yng Nghymru, sef y meincnod ar gyfer parciau a mannau gwyrdd ledled y DU. Mae Gwobr y Faner Werdd yn helpu i wella ystod eang o fannau agored, trwy annog buddsoddiad a balchder yn ein mannau agored, gan gynnwys llawer mewn ardaloedd trefol. Ar hyn o bryd mae 201 o safleoedd wedi'u dyfarnu ledled Cymru, gan gynnwys 112 o Wobrau Cymunedol.

Gwaredu mannau gwyrdd ac agored

Mewn rhai amgylchiadau gall fod yn briodol cael gwared ar fannau agored neu eu hailddatblygu at ddefnydd arall. Mae Polisi Cynllunio Cymru yn nodi amgylchiadau lle gallai hyn fod yn briodol a gofynnir am farn Chwaraeon Cymru yn y sefyllfaoedd hyn. Mae amddiffyniad pellach rhag colli lleoedd chwarae yn amhriodol trwy ddeddfwriaeth sy'n llywodraethu prosesau i'w dilyn gan awdurdodau lleol. Mae'r [rheoliadau hyn](#) yn ei gwneud yn ofynnol i awdurdodau lleol hysbysebu eu bwriad ac ystyried unrhyw sylwadau y mae'n eu derbyn cyn y gallant gael gwared ar gaeau chwarae.

Yn gywir,



Julie James AC/AM

Y Gweinidog Tai a Llywodraeth Leol
Minister for Housing and Local Government